

## Najavljene nove investicije iz bh. dijaspore

### Završen prvi Online Biznis Forum i b2b sastanci sa bh.dijasporom „Potencijali i perspektive investiranja u metalni sektor i prateće industrije u BiH“

Jučer, 07.04.2021.god., održan je online Biznis Forum organizovan za predstavnike poslovne bh.dijaspole, bh. poduzetnika, lokalnih zajednica, relevantnih ministarstava, privrednih komora i udruženja iz oblasti metalnog sektora i pratećih industrija. Nakon 62 održana B2B sastanka, najavljene su i nove zajedničke investicije između bh. dijaspole i bh. poduzetnika. Online Biznis Forum je organizovan u sklopu projekata „Dijaspora za razvoj“ (D4D), koji je projekat Ministarstva za ljudska prava i izbjeglice BiH i Vlade Švicarske, u partnerstvu sa UNDP BiH i IOM BiH, u saradnji sa Sarajevskom regionalnom razvojnom agencijom SERDA i partnerskim općinama.

Preko 60 učesnika prisustvovalo je konferencijskom dijelu Biznis Forumu, dok je na b2b sastancima učestvovalo 46 kompanija iz Bosne i Hercegovine, Austrije, Njemačke, Danske, Švicarske, Velike Britanije i Sjeverne Makedonije.

Prisutnim predstavnicima su se obratili predstavnici vladinog sektora, diplomatskog kora i međunarodnih institucija koji su istakli bitnost povezivanja ne samo sa kompanijama u vlasništvu bh. državljana, nego i sa pojedincima koji su na rukovodećim položajima unutar svjetskih kompanija. „*Da bismo uspjeli da budemo stabilan dio lanaca dobavljača, neophodno je ostvariti snažnu konekciju sa bh. državljanima koji rade u svjetskim kompanijama, na vodećim pozicijama.*“, istakao je dipl.ing.maš. Mirsad Jašarspahić, Potpredsjednik Privredne/Gospodarske Komore Federacije Bosne i Hercegovine.

Mr. Began Muhić, Generalni konzul Bosne i Hercegovine u Štuttgartu, je istakao kako vlada velika zainteresovanost od strane bh. dijaspole i bh. privrednika koji posluju u dijaspori da dio poslovanja prenesu u Bosnu i Hercegovinu. „*Mi trebamo raditi promociju zemlje i poslovnog ambijenta kako bismo zainteresirali investitore i poslovne subjekte za saradnju, te investiciju u BiH. BiH je jedna od najpovoljnijih zemalja za investicije u cijeloj Evropi, te je dragocjeno isticati pozitivne primjere kako bi prikazali pozitivnu klimu za investiranje.*“, istakao je Began Muhić, generalni konzul BiH u Štuttgartu.

Dr. Samir Vildić, Direktor kompanije BPI - Bosnia Partnership Investment je predstavnik bh. dijaspole koji je, zajedno sa partnerima koji dolaze iz dijaspole, otvorio još jednu firmu u našoj zemlji, a koja djeluje u nekoliko segmenata. Jedan od segmenata je poslovni konsalting za firme iz bh. dijaspole koje žele da investiraju u BiH.



*“Jako je bitno da stvaramo zajedničke ciljeve, a gdje će veliki doprinos dati upravo bh. dijaspora. U svoj veliki uspjeh ubrajam povratak u BiH, te osnivanje firme ovdje. Ljudski potencijal je jako bitan, imamo potencijale u ljudskom sektoru, ali i druge brojne potencijale koji se kriju u BiH. Kada smo prije nekoliko godina osnivali firmu u inozemstvu, zastupali smo jedan svjetski brend, te nismo mogli ni slutiti da ćemo za kratko vrijeme upravo za taj brend otvoriti firmu i postrojenja u BiH. „, izjavio je gosp. Vildić.*

U sklopu Biznis Forumu prisutni su se osvrnuli i na problem odlaska mlade populacije iz Bosne i Hercegovine.

Kemo Sarač, Pomoćnik ministra za ljudska prava i izbjeglice Bosne i Hercegovine, se osvrnuo na ovu temu, te je izjavio: *„Mi nećemo moći spriječiti odlazak mladih ljudi iz Bosne i Hercegovine. Ono što možemo uraditi je omogućiti mehanizme koji podstiču cirkulaciju znanja i vještina koje posjeduju obrazovani mladi ljudi koji borave u iseljeništvu.“*

Jedan od primjera gdje se iskustvo i znanje iz iseljenitstva nesebično dijeli je općina Živinice. Doc.dr.sc. Samir Kamenjaković, Gradonačelnik Grada Živinice, najavio je osnivanje naučno-tehnološkog parka u Živinicama kroz koji će se omogućiti razmjena znanja i iskustva, te ojačati umrežavanje, a sve u cilju novih investicija i boljeg kvaliteta života.

*„Svaka lokalna zajednica treba imati kancelariju za dijasporu i službenika koji se bavi pitanjima iz dijaspore. Mi imamo mogućnost da aktivno sarađujemo sa drugim državama i to upravo posredstvom dijaspore.“*, izjavio je gosp. Kamenjaković.

Općina Žepče je još jedan pozitivan primjer investicija bh. dijaspore. Branka Janko, Direktorica Razvojne agencije Žepče je istakla da danas općina Žepče ima 14 kompanija sa investicijama iz dijaspore, te uložnim kapitalom od 25 mil. KM i preko 200 uposlenih radnika. Istakla je da je za privlačenje investicija iz dijaspore, važna posvećenost lokalne administracije prema svakom vidu investiranja odnosno kreiranje poslovnog okruženja u kojem će svaka investicija „pasti“ na plodno tlo i iz nje nastati nova radna mjesta i novi biznisi.

Drugi dio Biznis Forumu bio je rezervisan za individualne b2b sastanke. Preko 60 sastanaka između predstavnika bh. kompanija i predstavnika poslovne dijaspore je održano, a najavljena su i nova partnerstva, te nove investicije od strane bh. dijaspore u BiH.

Sljedeći Online Biznis Forum i b2b sastanci sa bh. dijasporom na temu „Potencijali i perspektive investiranja u poljoprivredu i proizvodnju hrane u BiH“ najavljeni su za 19.maj 2021. sa početkom u 10h, sa ciljem da predstavi potencijale za ulaganje bh. dijaspore u poljoprivredni sektor i proizvodnju hrane, prezentira uspješne priče dosadašnjih investitora, te da kroz individualne b2b sastanke podrži bh. poduzetnike i predstavnike bh. dijaspore u kreiranju novih partnerstava.